

**ZAKON  
O GASOVODU "JUŽNA INTERKONEKCIJA BOSNA I HERCEGOVINA I  
REPUBLIKA HRVATSKA"**

**POGLAVLJE I. OPĆE ODREDBE**

**Član 1.**

(Predmet Zakona)

Ovim zakonom uređuju se pitanja od značaja za realizaciju projekta izgradnje gasovoda "Južna interkonekcija Bosna i Hercegovina i Republika Hrvatska" na pravcu Zagvozd (Republika Hrvatska) - granica Republika Hrvatska/Bosna i Hercegovina - Posušje (Bosna i Hercegovina) - Tomislavgrad - Šuica - Kupres - Bugojno - Novi Travnik/Travnik i pravcu Posušje - Grude - Široki Brijeg - Mostar, s odvojcima prema Livnu, Gornjem Vakufu-Uskoplju i Jajcu (u daljnjem tekstu: projekt gasovoda „Južna interkonekcija Bosna i Hercegovina i Republika Hrvatska“) na teritoriji Federacije Bosne i Hercegovine, uključujući infrastrukturu projekta, tačku interkonekcije, investitora, način finansiranja, javni interes i provedbu eksproprijacije nekretnina, korištenje zemljišta, upravne postupke izdavanja dozvola i uključenost vlada kantona, nadležnih ministarstava i drugih organa uprave, institucija i privrednih društava te druga pitanja od značaja za realizaciju projekta.

**Član 2.**

(Definicije pojmova)

Pojedini pojmovi koji se koriste u ovom zakonu imaju značenja utvrđena propisima kojima se uređuju područja prostornog planiranja, građenja i upotrebe zemljišta, zaštite okoliša, upravljanja vodama, energije i gasne privrede u Federaciji Bosne i Hercegovine.

**POGLAVLJE II. PROJEKT GASOVODA "JUŽNA INTERKONEKCIJA BOSNA I  
HERCEGOVINA I REPUBLIKA HRVATSKA"**

**Član 3.**

(Infrastruktura projekta gasovoda "Južna interkonekcija Bosna i Hercegovina i  
Republika Hrvatska")

Infrastruktura projekta gasovoda "Južna interkonekcija Bosna i Hercegovina i Republika Hrvatska" u Bosni i Hercegovini uključuje sljedeće elemente:

**a) gasnu infrastrukturu:**

- 1) tačka interkonekcije gasnih transportnih sistema Bosne i Hercegovine i Republike Hrvatske;
- 2) cjevovodna infrastruktura;
- 3) objekti na gasovodu:
  - primopredajna stanica,
  - otpremne, prijemne i otpremno-prijemne čistačke stanice,
  - mjerne i mjerno-regulacione stanice za snabdijevanje potrošača duž glavnog gasovoda i odvojka,
  - blok-stanice,
  - stanice katodne zaštite sa pripadajućim anodnim ležištima,
  - instalacije i oprema za nadzor i upravljanje;

- b) prateću energetska infrastrukturu:
  - 1) infrastruktura za snabdijevanje električnom energijom pripadajućih objekata na gasovodu,
  - 2) infrastruktura za snabdijevanje vodom nadzemnih objekata;
- c) cestovnu infrastrukturu za pristup nadzemnim objektima i trasi gasovoda tokom gradnje i nakon puštanja u pogon.

#### **Član 4.**

(Tačka interkonekcije)

- (1) Koordinate tačke interkonekcije transportnih sistema definiraju se posebnim sporazumom između dva susjedna operatora transportnih sistema i to: Gospodarsko društvo za proizvodnju i transport plina "Južna plinska interkonekcija" d.o.o. Mostar iz Bosne i Hercegovine sa sjedištem u Mostaru kao javno preduzeće čiji je osnivač Federacija Bosne i Hercegovine i "Plinacro" d.o.o. iz Republike Hrvatske.
- (2) Sporazum o tački interkonekcije iz stava (1) ovog člana sastavni je dio Međudržavnog sporazuma između Bosne i Hercegovine i Republike Hrvatske o izgradnji gasovoda Južna interkonekcija Bosna i Hercegovina i Republika Hrvatska.

#### **Član 5.**

(Investitor)

- (1) Za nositelja investicije projekta gasovoda "Južna interkonekcija Bosna i Hercegovina i Republika Hrvatska" određuje se Gospodarsko društvo za proizvodnju i transport plina "Južna plinska interkonekcija" d.o.o. Mostar (u daljnjem tekstu: investitor).
- (2) Investitor će projekt izgradnje gasovoda "Južna interkonekcija Bosna i Hercegovina i Republika Hrvatska" realizovati u dva pravca čija će izgradnja početi istovremeno i to:
  - a) izgradnja interkonekcijskog transportnog gasovoda u Bosni i Hercegovini na pravcu granica Republika Hrvatska/Bosna i Hercegovina - Posušje - Tomislavgrad - Šuica - Kupres - Bugojno - Novi Travnik/Travnik sa odvojcima prema Livnu, Gornjem Vakufu-Uskoplju i Jajcu;
  - b) izgradnja transportnog gasovoda u Bosni i Hercegovini na pravcu Posušje - Grude - Široki Brijeg - Mostar.
- (3) Prostorni planovi područja kantona na kojima će se graditi gasovod uskladit će se sa trasom gasovoda iz idejnog projekta trase gasovoda "Južna interkonekcija Bosna i Hercegovina i Republika Hrvatska".
- (4) Projekt gasovoda "Južna interkonekcija Bosna i Hercegovina i Republika Hrvatska" realizovat će investitor u potpunosti i/ili u saradnji sa operatorima distribucijskog sistema i/ili u skladu sa zakonskim propisima o javno-privatnom partnerstvu i drugim važećim zakonskim propisima.
- (5) Investitor je dužan nakon puštanja u pogon gasovoda "Južna interkonekcija Bosna i Hercegovina i Republika Hrvatska" omogućiti i njegov siguran rad i sve tehničke uvjete za prihvatanje u transportni sistem gasa koji se uvozi iz različitih izvora

spomenutog pravca kroz visokotlačni transportni sistem od ulaza u transportni sistem do primopredajnih mjerno-regulacijskih stanica, s ciljem isporuke gasa kupcima i očuvanja postojećeg i razvoja novog tržišta prirodnog gasa.

- (6) Investitor se zadužuje da osposobi postojeći vlastiti transportni sistem (etapno) za reverzibilan rad i prilagodi ga tehničkim zahtjevima kao neodvojivi dio gasovoda "Južna interkonekcija Bosna i Hercegovina i Republika Hrvatska" te na taj način omogući stabilno snabdijevanje postojećih potrošača u Federaciji Bosne i Hercegovine.

#### **Član 6.**

(Način finansiranja)

- (1) Uz podršku Vlade Federacije Bosne i Hercegovine realizacija projekta "Južna interkonekcija Bosna i Hercegovina i Republika Hrvatska" finansirat će se zaduživanjem, grantovima, proračunskim i vlastitim sredstvima investitora, modelom javno-privatnog partnerstva (JPP) te drugim izvorima finansiranja.
- (2) Vlada Federacije Bosne i Hercegovine sa svoje strane poduzimat će raspoložive mjere sa ciljem nadzora i osiguranja pozitivnog poslovanja investitora, a u godinama realizovanja projekta ostvarenu dobit investitora koristit će za potrebe realizacije projekta "Južna interkonekcija Bosna i Hercegovina i Republika Hrvatska".

### **POGLAVLJE III. RJEŠAVANJE IMOVINSKO-PRAVNIH ODNOSA**

#### **Član 7.**

(Javni interes i provedba eksproprijacije)

- (1) Utvrđuje se javni interes za izgradnju gasovoda "Južna interkonekcija Bosna i Hercegovina i Republika Hrvatska" s ciljem eksproprijacije i privremenog zauzimanja nekretnina potrebnih za izgradnju, upravljanje i održavanje infrastrukture ovog gasovoda.
- (2) Javni interes iz stava (1) ovog člana utvrđuje se nad nekretninama obuhvaćenim elaboratom o eksproprijaciji koji je sastavni dio idejnog projekta gasovoda „Južna interkonekcija Bosna i Hercegovina i Republika Hrvatska“. Idejni projekt gasovoda „Južna interkonekcija Bosna i Hercegovina i Republika Hrvatska“ sastavni je dio ovog zakona.
- (3) Izmjene elaborata iz stava (2) ovog člana na zahtjev investitora odobrava Vlada Federacije Bosne i Hercegovine u roku 30 dana od dana podnošenja zahtjeva.
- (4) Investitor se određuje za korisnika eksproprijacije te ima sva prava, obaveze i odgovornosti korisnika eksproprijacije predviđene Zakonom o eksproprijaciji ("Službene novine Federacije BiH", br. 70/07, 36/10, 25/12, 8/15 – presuda Ustavnog suda Federacije Bosne i Hercegovine, br: U-64/14 i 34/16) i odredbama ovog zakona.
- (5) Obavezuju se općinske službe za upravu koje provode postupke eksproprijacije putem namjenski formiranih komisija da osiguraju prioritetan rad komisija na predmetima eksproprijacije vezanim uz realizaciju projekta "Južna interkonekcija Bosna i Hercegovina i Republika Hrvatska".

## **POGLAVLJE IV. PROMJENA NAMJENE ZEMLJIŠTA**

### **Član 8.**

(Promjena namjene zemljišta)

Promjena namjene šumskog i poljoprivrednog zemljišta za potrebe građenja gasovoda „Južna interkonekcija Bosna i Hercegovina i Republika Hrvatska“ vršit će se u skladu sa nadležnostima kantona i Federacije Bosne i Hercegovine.

## **POGLAVLJE V. IZDAVANJE DOZVOLA, SAGLASNOSTI I DRUGIH AKATA**

### **Član 9.**

(Vodni akti)

Izdavanje vodnih akata za izgradnju gasovoda „Južna interkonekcija Bosna i Hercegovina i Republika Hrvatska“ vršit će se u skladu sa nadležnostima agencija za vodna područja i kantonalnih ministarstava.

### **Član 10.**

(Zaštita okoliša)

U skladu sa odredbama Zakona o zaštiti okoliša („Službene novine Federacije BiH“, br. 15/21) i Uredbe o projektima za koje je obavezna procjena utjecaja na okoliš, te projektima za koje se odlučuje o potrebi procjene utjecaja na okoliš („Službene novine Federacije BiH“, br. 51/21, 33/22 i 104/22) za izgradnju gasovoda „Južna interkonekcija Bosna i Hercegovina i Republika Hrvatska“ potrebno je utvrditi obavezu i obim provedbe procjene utjecaja na okoliš.

### **Član 11.**

(Odobranje građenja)

- (1) Odobranje građenja vrši Federalno ministarstvo prostornog uređenja izdavanjem odobrenja za građenje, uz prethodno izdavanje urbanističke saglasnosti.
- (2) Građenje se može odobriti ako se prethodno utvrdi da predmetno građenje nije u suprotnosti sa odredbama ovog zakona.

### **Član 12.**

(Urbanistička saglasnost)

- (1) Urbanistička saglasnost izdaje se na osnovu stručne ocjene komisije koju imenuje Parlament Federacije Bosne i Hercegovine i koja se obavezno sastoji od jednog predstavnika Federalnog ministarstva prostornog uređenja te po jednog predstavnika kantonalnih ministarstava nadležnih za poslove prostornog uređenja iz kantona: Zapadnohercegovački, Hercegovačko-neretvanski, Srednjobosanski i Kanton 10 u kojima je u Federaciji Bosne i Hercegovine lociran gasovod „Južna interkonekcija Bosna i Hercegovina i Republika Hrvatska“.
- (2) Zahtjev za izdavanje urbanističke saglasnosti investitor podnosi za složeni građevinski objekt u cjelini ili njegov poseban dio ili pojedinačni objekt koji čini građevinsku cjelinu, te sadrži:
  - a) podatke o parceli (kopija katastarskog plana i katastar podzemnih instalacija),
  - b) idejni projekt,

- c) relevantan dokument sa gledišta zaštite okoliša,
  - d) obrazloženje zahtjeva sa podacima potrebnim za utvrđivanje urbanističko-tehničkih i drugih uvjeta,
  - e) prethodnu vodnu saglasnost (ako je to propisano posebnim zakonom),
  - f) načelne saglasnosti i mišljenja propisana posebnim zakonima,
  - g) idejni plan upravljanja građevinskim otpadom,
  - h) pripremnu geotehničku studiju (misija G1).
- (3) Načelne saglasnosti iz stava (2) ovog člana su dokumenti koji opisuju pod kojim uvjetima je moguća izgradnja predmetnog objekta i moraju se izdati u roku 15 dana od dana zaprimanja urednog zahtjeva investitora ili Federalnog ministarstva prostornog uređenja.
- (4) Urbanistička saglasnost vrijedi do izdavanja odobrenja za gradnju.
- (5) Federalno ministarstvo prostornog uređenja dužno je izdati urbanističku saglasnost u roku 15 dana od dana uredno podnesenog zahtjeva.

### Član 13.

(Odobrenje za građenje)

- (1) Zahtjev za izdavanje odobrenja za građenje investitor podnosi za složeni građevinski objekt u cjelini ili njegov poseban dio ili pojedinačni objekt koji čini građevinsku cjelinu, te sadrži:
- a) urbanističku saglasnost,
  - b) glavni projekt,
  - c) pisani izvještaj o obavljenoj kontroli glavnog projekta,
  - d) pisani izvještaj i potvrdu o izvršenoj nostrifikaciji (u slučaju da se radi o investicijsko-tehničkoj dokumentaciji izrađenoj u inozemstvu),
  - e) glavni projekt - misija geotehničkog inženjerstva (misija G21) sa izvještajem o reviziji projekta (misija G23),
  - f) glavni projekt zaštite od požara,
  - g) **elaborat (elaborat o zaštiti... ?) zaštite na radu,**
  - h) detaljan plan upravljanja građevinskim otpadom,
  - i) dokaz o riješenim imovinsko-pravnim odnosima,
  - j) vodnu saglasnost (ako je to propisano posebnim zakonom),
  - k) saglasnosti na glavni projekt propisane posebnim zakonima.
- (2) Federalno ministarstvo prostornog uređenja dužno je izdati odobrenje za građenje u roku 15 dana od dana isteka roka za uvid u glavni projekt po javnom pozivu koji se objavljuje u **(najmanje jednom dnevnom listu koji izlazi na području Federacije Bosne i Hercegovine...) dnevnom listu na području Federacije Bosne i Hercegovine** i oglasnoj ploči Federalnog ministarstva prostornog uređenja.
- (3) Odobrenje za građenje važi do izdavanja odobrenja za upotrebu.

### Član 14.

(Odobrenje za upotrebu)

- (1) Zahtjev za izdavanje odobrenja za upotrebu investitor podnosi za složeni građevinski objekt u cjelini ili njegov zaseban dio ili pojedinačni objekt koji čini građevinsku cjelinu, te sadrži:
- a) odobrenje za građenje,
  - b) kopiju katastarskog plana sa ucrtanim položajem građevine,
  - c) pisanu izjavu izvođača radova o izvedenim radovima i uvjetima za održavanje građevine,

- d) pisani izvještaj nadzornog organa o izvršenom nadzoru nad građenjem,
  - e) geotehničku izvedbenu studiju (misija G31) sa revizijom (misija G41),
  - f) vodnu dozvolu (ako je to propisano posebnim zakonom).
- (2) Federalno ministarstvo prostornog uređenja dužno je izdati odobrenje za upotrebu u roku 15 dana nakon obavljenog tehničkog pregleda građevine i prijema dokaza o uplati naknade za rad komisije za tehnički pregled investitora, a u skladu sa odredbama Zakona o prostornom planiranju i korištenju zemljišta na nivou Federacije Bosne i Hercegovine ("Službene novine Federacije BiH", br.: 2/06, 72/07, 32/08, 4/10, 13/10, 45/10 i 85/21) i odredbama Pravilnika o tehničkom pregledu građevine ("Službene novine Federacije BiH", br.: 58/14, 89/18 i 44/20).

## **POGLAVLJE VI. SARADNJA SA KANTONIMA I JEDINICAMA LOKALNE SAMOUPRAVE**

### **Član 15.**

(Uključenost vlada kantona)

Vlade kantona: Zapadnohercegovački, Hercegovačko-neretvanski, Srednjobosanski i Kanton 10 u kojima je u Federaciji Bosne i Hercegovine locirana "Južna interkonekcija Bosna i Hercegovina i Republika Hrvatska" te nadležne institucije i organi vlasti u navedenim kantonima će, u skladu sa svojim nadležnostima:

- a) provesti potrebne procedure i donijeti odgovarajuće odluke potrebne za osiguranje realizacije projekta gasovoda „Južna interkonekcija Bosna i Hercegovina i Republika Hrvatska“ na području svoje nadležnosti;
- b) poduzeti sve potrebne aktivnosti da nadležna tijela jedinica lokalne samouprave, čijom teritorijom prolazi planirana trasa projekta gasovoda „Južna interkonekcija Bosna i Hercegovina i Republika Hrvatska“, sve zahtjeve zaprimljene u postupku rješavanja imovinsko-pravnih poslova rješavaju po hitnom postupku;
- c) za potrebe realizacije projekta gasovoda „Južna interkonekcija Bosna i Hercegovina i Republika Hrvatska“ sarađuju sa investitorom i u tom smislu osiguraju potrebnu dokumentaciju i informacije, kao i drugu podršku iz svoje nadležnosti.

## **POGLAVLJE VII. NADZOR NAD PROVOĐENJEM ZAKONA**

### **Član 16.**

(Nadzor nad provođenjem Zakona)

- (1) Nadzor nad provođenjem ovog zakona vrše Federalno ministarstvo energije, rudarstva i industrije, Federalno ministarstvo prostornog uređenja i Federalno ministarstvo okoliša i turizma, svako u okviru svojih nadležnosti.
- (2) Nadzor nad provođenjem ovog zakona i akata donesenih na osnovu njega u dijelu koji se odnosi na obaveze učesnika u gradnji, provodi nadležna građevinska inspekcija.

## POGLAVLJE VIII. ZAVRŠNE ODREDBE

### Član 17.

(Supsidijarna primjena i rješavanje sukoba zakona)

- (1) Na sva pitanja od značaja za provođenje projekta gasovoda „Južna interkonekcija Bosna i Hercegovina i Republika Hrvatska“ koja nisu uređena ovim zakonom, primjenjuju se propisi koji regulišu **dato područje (datu oblast)**.
- (2) U slučaju da su odredbe drugih zakona u suprotnosti sa odredbama ovog zakona, primjenjuju se odredbe ovog zakona.
- (3) Ako nije drugačije propisano ovim zakonom, izdavanje akata vrši se prema odredbama Zakona o upravnom postupku (“Službene novine Federacije BiH”, br. 2/98 i 48/99).

### Član 19.

(Stupanje na snagu)

Ovaj zakon stupa na snagu osmog dana od dana objavljivanja u “Službenim novinama Federacije BiH”.

# OBRAZLOŽENJE ZAKONA O GASOVODU „JUŽNA INTERKONEKCIJA BOSNA I HERCEGOVINA I REPUBLIKA HRVATSKA”

## I. USTAVNI OSNOV

Ustavni osnov za donošenje zakona o gasovodu „Južna interkonekcija Bosna i Hercegovina i Republika Hrvatska“ sadržan je u članu III.1. tačka f), koji je izmijenjen amandmanima VIII., LXXXIX. i CVI. na Ustav Federacije Bosne i Hercegovine i člana IV. A. 20. (1) d) Ustava Federacije Bosne i Hercegovine prema kojima je u isključivoj nadležnosti Federacije utvrđivanje energetske politike, uključujući raspodjelu između kantona te osiguranje i održavanje potrebne infrastrukture, a Parlament Federacije Bosne i Hercegovine, uz ostala ovlaštenja predviđena Ustavom, odgovoran je za donošenje zakona o obavljanju dužnosti federalne vlasti.

## II. RAZLOZI ZA DONOŠENJE ZAKONA

Federacija Bosne i Hercegovine trenutno se snabdijeva prirodnim gasom iz samo jednog pravca i samo jednog izvora koristeći transportni gasovod koji prelazi granicu Srbije i Bosne i Hercegovine u mjestu Šepak i nastavlja do Zvornika, Kladnja, Sarajeva, Zenice i Travnika. Osim činjenice da je Federacija Bosne i Hercegovine zavisna od samo jednog izvora i pravca snabdijevanja potrebno je istaći i to da postojeći gasovod, izgrađen 1979. godine, karakteriše zastarjelost te velika opterećenost tokom zimskog peioda kada je potrošnja gasa najveća.

Zato je izgradnja nove gasne interkonekcije „Južna interkonekcija Bosna i Hercegovina i Republika Hrvatska“ (u daljnjem tekstu: *Južna interkonekcija*) na pravcu Zagvozd (Republika Hrvatska) – granica Republika Hrvatska/Bosna i Hercegovina - Posušje (Bosna i Hercegovina) - Tomislavgrad - Šuica - Kupres – Bugojno - Novi Travnik/Travnik i pravcu Posušje – Grude - Široki Brijeg – Mostar, sa odvojcima prema Livnu, Gornjem Vakufu-Uskoplju i Jajcu (u daljnjem tekstu: projekt gasovoda „Južna interkonekcija Bosna i Hercegovina i Republika Hrvatska“) na teritoriji Federacije Bosne i Hercegovine prepoznata kao projekt od najvećeg prioriteta za Federaciju Bosne i Hercegovine. Ovaj projekt uvršten je u sve ključne strateške, planske i razvojne dokumente donesene na nivou Federacije Bosne i Hercegovine i Bosne i Hercegovine, uključujući i Okvirnu energetska strategiju Bosne i Hercegovine do 2035. godine, Okvirnu energetska strategiju Federacije Bosne i Hercegovine do 2035. godine te Program javnih investicija Federacije Bosne i Hercegovine 2020.-2022.

Realizacija projekta „Južna interkonekcija“ ključna je za održavanje sigurnosti snabdijevanja prirodnim gasom na području cijele Federacije Bosne i Hercegovine, kao i za diverzifikaciju izvora i pravaca snabdijevanja prirodnim gasom zbog čega je projekt „Južna interkonekcije“ jedan od najvažnijih strateških infrastrukturnih projekata u području energetike u Federaciji Bosne i Hercegovine.

Nadalje, prema trenutno važećem pravnom okviru u oblasti prirodnog gasa u Federaciji Bosne i Hercegovine (Uredba o organizaciji i regulaciji sektora gasne privrede, objavljena u „Službenim novinama Federacije BiH“, broj: 83/07, 71/21 i 91/22) svi učesnici u sektoru gasa „dužni su planirati i poduzimati mjere za sigurnu



snabdijevnost gasom u skladu sa propisanim standardima snabdijevanja gasom i odgovorni su za sigurnost snabdijevanja gasom u okviru svoje djelatnosti“.

Gasovod *Južna interkonekcija* u građevinskom smislu spada u kategoriju linijskih infrastrukturnih objekata koji su specifični po tome što se prostiru na široj geografskoj teritoriji, prolaze kroz velik broj zemljišnih parcela, ali i prelaze preko različitih vrsta zemljišta (šumsko, poljoprivredno, vodno, itd.). Iz tog razloga odobravanje građenja ovakvih objekata podrazumijeva kompleksne postupke eksproprijacije i složene upravne postupke u kojima nadležni organi izdaju veliki broj dozvola i drugih upravnih akata. Detaljne analize postupka izdavanja dozvola za izgradnju energetske infrastrukture u Federaciji Bosne i Hercegovine, koje je usvojila Vlada Federacije Bosne i Hercegovine, ukazale su da postojeći zakonodavni okvir za izgradnju energetske infrastrukture ne osigurava brzu realizaciju projekata ove vrste.

Iz tog razloga bilo je potrebno pristupiti izradi posebnog zakona koji bi uredio pitanje izgradnje "Južne interkonekcije" kroz propisivanje posebnih upravnih postupaka za izdavanje dozvola sa skraćenim rokovima, čime bi se osigurala efikasna realizacija ovog strateškog projekta.

### III. USKLADENOST SA PROPISIMA EVROPSKE UNIJE

Nakon uvida u propise Evropske unije i analize odredbi ovog zakona, utvrđeno je da se ovim zakonom ne vrši usklađivanje sa propisima Evropske unije.

### IV. OBRAZLOŽENJE POJEDINIH ODREDBA

**Članom 1. Prijedloga Zakona** propisan je predmet ovog zakona.

**Članom 2. Prijedloga Zakona** definisano je da pojmovi korišteni u ovom zakonu imaju značenja utvrđena propisima koji uređuju područja prostornog planiranja, građenja i upotrebe zemljišta, zaštite okoliša, upravljanja vodama, energije i gasne privrede u Federaciji Bosne i Hercegovine. Nije bilo potrebe za novim definiranjem pojmova, s obzirom na to da se Prijedlogom Zakona ne uvode novi pojmovi koji nisu već definisani propisima koji uređuje navedena područja. Također, svi pojmovi koji se koriste u ovom zakonu imaju uobičajeno značenje koje nije potrebno dodatno definirati.

**Članom 3. Prijedloga Zakona** definisana je infrastruktura gasovoda koja se sastoji od gasne infrastrukture, prateće energetske infrastrukture i cestovne infrastrukture za pristup nadzemnim objektima i trasi gasovoda tokom gradnje i nakon puštanja u pogon.

**Članom 4. Prijedloga Zakona** definisano je da će se tačka interkonekcije transportnih sistema odrediti posebnim sporazumom između dva susjedna operatora transportnih sistema iz Bosne i Hercegovine i Republike Hrvatske. Time je dato zaduženje Gospodarskom društvu za proizvodnju i transport plina "Južna plinska interkonekcija" d.o.o. Mostar iz Bosne i Hercegovine da poduzme potrebne aktivnosti kako bi se osigurala provedba projekta *Južna interkonekcija*. Također, s obzirom na nadležnosti državnog nivoa vlasti za odobravanje novih interkonekcija, stavom (2) ovog člana propisano je da će sporazum dva susjedna operatera transportnih sistema biti sastavni dio Međudržavnog sporazuma između Bosne i Hercegovine i Republike Hrvatske koji će se zaključiti u skladu sa odgovarajućim procedurama.

**Članom 5. Prijedloga Zakona** za nositelja investicije projekta određeno je Gospodarsko društvo za proizvodnju i transport plina "Južna plinska interkonekcija" d.o.o. Mostar iz Bosne i Hercegovine te su propisane njegove dužnosti i obaveze kako bi se stvorili tehnički preduvjeti za sigurno povezivanje predmetnog gasovoda sa postojećim gasnim sistemom Federacije Bosne i Hercegovine. Definirani su pravci gasne infrastrukture i način realizacije projekta.

**Članom 6. Prijedloga Zakona** propisane su obaveze investitora i njegovog osnivača - Federacije Bosne i Hercegovine kako bi se osigurala dovoljna finansijska sredstva za izgradnju i puštanje u pogon predmetnog gasovoda.

**Članom 7. Prijedloga Zakona** utvrđen je javni interes za izgradnju gasovoda što je neophodan preduvjet za provođenje postupka eksproprijacije, te određen način izmjene elaborata o eksproprijaciji, korisnik eksproprijacije i prioritetan rad komisije na predmetima eksproprijacije. Ovaj član formulisan je kako bi se stvorili potrebni preduvjeti za provođenje postupka eksproprijacije radi izgradnje, upravljanja i održavanja infrastrukture predmetnog gasovoda.

Naime, ranije spomenutim analizama postupka izdavanja dozvola za izgradnju energetske infrastrukture ustanovljeno je kako je rješavanje imovinsko-pravnih odnosa (posebno kroz postupak eksproprijacije nekretnina) jedan od najvećih problema sa kojima se investitori suočavaju prilikom izgradnje objekata energetske infrastrukture. Rješavanje imovinsko-pravnih odnosa prethodi izdavanju odobrenja za gradnju i često predstavlja najdugotrajniji, najskuplji i najkomplikovaniji dio postupka ishoda dozvola. Investitor se određuje za korisnika eksproprijacije, te ima sva prava, obaveze i odgovornosti korisnika eksproprijacije predviđene Zakonom o eksproprijaciji ("Službene novine Federacije BiH", br.: 70/07, 36/10, 25/12 i 8/15 – presuda Ustavnog suda Federacije Bosne i Hercegovine, br. U-64/14 i 34/16) i odredbama ovog zakona.

**Članom 8. Prijedloga Zakona** uređen je postupak promjene namjene zemljišta. Naime, u skladu sa propisima iz područja prostornog planiranja i građenja, građenje se može odobriti samo na zemljištu koje je određeno kao građevinsko. Stoga je potrebno izvršiti promjenu namjene svih drugih vrsta zemljišta (npr. šumsko ili poljoprivredno) na kojima se planira gradnja gasovoda.

**Članom 9. Prijedloga Zakona** propisan je postupak izdavanja vodnih akata. S obzirom na to da se gasovodi kao objekti linijske infrastrukture prostiru većom teritorijom to povećava šanse da će oni svojom trasom prelaziti preko površinskih voda. Prema postojećem zakonodavstvu iz područja zaštite voda u Federaciji Bosne i Hercegovine površinske vode podijeljene su u dvije kategorije (prva i druga kategorija) a u skladu sa tim kategorijama izvršena je i podjela nadležnosti za upravljanje i odobravanje građenja u blizini ili preko površinskih voda, odnosno izdavanje vodnih akata. Tako su za površinske vode prve kategorije nadležne federalne agencije za vodna područja, dok su površinske vode druge kategorije date u nadležnost kantonalnih ministarstava za vodoprivredu na čijem teritoriju se nalazi površinska voda.

**Članom 10. Prijedloga Zakona** propisan je postupak utvrđivanja obaveze i obima provođenja procjene utjecaja na okoliš u skladu sa pozitivno-pravnim propisima iz područja zaštite okoliša.

**Članom 11. Prijedloga Zakona** propisana je nadležnost Federalnog ministarstva prostornog uređenja za odobravanje građenja predmetnog gasovoda. Ovakvo rješenje u skladu je sa važećim propisima koji uređuju ovo područje (ovu oblast!).

**Članom 12. Prijedloga Zakona** propisan je postupak izdavanja urbanističke saglasnosti, sadržaj zahtjeva za izdavanje urbanističke saglasnosti, postupak pribavljanja posebnih saglasnosti te skraćeni rokovi za izdavanje urbanističke saglasnosti za predmetni projekt. S obzirom na to da se građenje općenito može odobriti samo ako je u skladu sa prostorno-planskim dokumentima donesenim za predmetno područje, kao i činjenica da prostorni plan koji se trenutno primjenjuje u Federaciji Bosne i Hercegovine datira iz 1981. godine i da mu je istekao planski period (Prostorni plan Bosne i Hercegovine za period od 1981. do 2000. godine), bilo je neophodno definisati osnov za odobravanje građenja gasovoda "Južna interkonekcija". Dodatno, stavom (2) ovog člana jasno je propisana potrebna dokumentacija za izdavanje urbanističke saglasnosti kako bi se smanjio i precizirao broj potrebnih dokumenata te kako bi se izbjegle potrebe za dodatnim dopunjavanjem zahtjeva. S tim u vezi u stavu (3) ovog člana propisan je jasan rok u kojem se moraju izdati posebne saglasnosti i mišljenja te je ostavljena mogućnost da ih investitor pribavlja sam ili da to za njega učini Federalno ministarstvo prostornog uređenja po službenoj dužnosti. U stavu (4) propisan je duži rok važenja urbanističke saglasnosti budući da je u praksi uočeno da redovni rok važenja urbanističke saglasnosti od godinu dana nije dovoljan kod izgradnje velikih infrastrukturnih objekata pa su investitori bili primorani tražiti njezino produženje ili ponovo pribavljati urbanističku saglasnost. Stavom (5) izvršeno je skraćivanje roka za izdavanje urbanističke saglasnosti sa 30 na 15 dana od dana uredno podnesenog zahtjeva.

**Članom 13. Prijedloga Zakona** propisan je postupak izdavanja odobrenja za građenje te definisano da se odobrenje za građenje može izdati za objekt u cjelini ili njegov poseban dio, ili pojedinačni objekt koji čini građevinsku cjelinu te je tačno propisan sadržaj zahtjeva za izdavanje odobrenja za građenje. Također, ovim članom izvršeno je skraćivanje roka za izdavanje odobrenja za građenje sa 30 na 15 dana te je važenje ove dozvole produženo do izdavanja odobrenja za upotrebu.

**Članom 14. Prijedloga Zakona** propisan je postupak izdavanja odobrenja za upotrebu, preciziran je sadržaj zahtjeva za izdavanje odobrenja za upotrebu i izvršeno skraćivanje roka za njegovo izdavanje.

**Članom 15. Prijedloga Zakona** propisano je da će vlade kantona (kroz čije područje prolazi...) kojima prolazi gasovod "Južna interkonekcija" biti aktivno uključene u realizaciju izgradnje predmetnog gasovoda donošenjem odgovarajućih odluka. Zato će vlade ovih kantona, u skladu sa svojim nadležnostima:

- provesti sve potrebne procedure i donijeti odgovarajuće odluke,
- poduzeti sve potrebne aktivnosti da nadležna tijela jedinica lokalne samouprave u predmetnim kantonima sve zahtjeve zaprimljene tokom realizacije ovog projekta rješavaju po hitnom postupku,
- saradivati sa investitorom radi hitne realizacije predmetnog projekta i u tom smislu osigurati potrebnu dokumentaciju i informacije, kao i drugu podršku iz svoje nadležnosti.

**Članom 16. Prijedloga Zakona** propisana je nadležnost za vršenje nadzora nad provođenjem ovog zakona. Tako nadzor nad provođenjem ovog zakona vrše

Federalno ministarstvo energije, rudarstva i industrije, Federalno ministarstvo prostornog uređenja i Federalno ministarstvo okoliša i turizma, svako u okviru svojih nadležnosti, dok nadležna građevinska inspekcija vrši nadzor nad provođenjem zakona i akata donesenih na osnovu zakona u dijelu koji se odnosi na obaveze učesnika u građenju.

**Članom 17. Prijedloga Zakona** propisana je supsidijarna primjena zakona te rješavanje sukoba zakona. Na sva pitanja koja nisu uređena ovim zakonom primjenjuju se propisi koji regulišu **dato područje (datu oblast ?)**, a u slučaju da su odredbe drugih zakona u suprotnosti sa odredbama ovog zakona primjenjuju se odredbe ovog zakona. Također, propisana je i supsidijarna primjena Zakona o upravnom postupku ("Službene novine Federacije BiH", br. 2/98 i 48/99) na sve postupke izdavanja akta.

**Članom 18. Prijedloga Zakona** propisan je rok za stupanje na snagu ovog zakona.

#### **V. FINANSIJSKA SREDSTVA**

Za provođenje ovog zakona nije potrebno osigurati dodatna novčana sredstva u budžetu Federacije Bosne i Hercegovine.